

欽定剿平粵匪方略

欽定勦平粵匪方略卷三百八十八 甲子年

八月初一日己巳楊岳斌沈葆楨奏言據副將韓

進春稟稱南豐縣城於七月十八日克復其詳  
細情形容卽查明具奏奏入

上命議政王軍機大臣傳諭楊岳斌沈葆楨曰南豐  
縣城已經官軍克復一切詳細情形諒已奏報在  
途前此奏報克復宜黃等處著名賊首李侍賢汪

海洋陳炳汶等逆未據聲敘此次攻拔堅城該逆等是否殲擒抑已於宜黃等處殲斃該縣接壤甯都與福建建甯甯化處處毗連韓進春駐守建昌前報東路長興地方復有賊擾現在賊由何處竄逸著楊岳斌沈葆楨查明具奏並檄飭各路防兵嚴防竄越如賊偏近閩境仍遵前旨飛咨閩省督撫嚴飭防軍會剿毋稍疏虞

初六日

甲戌

李鴻章奏言自潘鼎新攻克晟舍賊

壘東岸賊營皆潰潘鼎新乘勝進紮晟舍劉秉

璋由吳淞楊淩偪紮湖東要隘張樹聲又由南

潯進紮織里各營連日出隊屢有斬擒臣聞湖

州賊勢趨重四安飛催劉銘傳等乘機蹙之劉

銘傳已親督黃桂蘭等先赴建平至廣德一路

布置劉盛藻等軍陸續繼進至湖州西面尹隆

橋大德橋一帶爲通四安廣德大道該逆聯營以護竄路臣飭郭松林等由呂山進攻尹隆橋扼其要害王永勝等營與賊對紮該逆於南岸築壘十餘座復添築濠牆二道郭松林等連夜趕築長牆調劉玉龍開花礮隊轟擊自七月十五日至十七日廖德旺等率衆猛攻哨官張祖述死之高占彪舒義志等皆受重傷郭松林等

激勵衆軍鼓勇齊進並飭呂山大德橋各營嚴  
截援賊開花礮轟缺賊卡一處衆勇各負蘆柴  
一束填塞賊濠王永勝督隊在前郭松林楊鼎  
勳督後一呼猛進直抵內濠郭松林揮令急進  
被槍子中傷左膀正欲踰濠登壘因大雨驟至  
收隊回營湖城賊首堵逆黃汶金復挑悍賊數  
千繞呂山後路八字橋阻我糧道十九日郭松

林派李長樂等搶築營壘賊衆由洞子門來撲我軍迎戰斃賊甚夥參將何錫恩死之各軍憤極齊上賊遂潰退二十日湖賊大隊自尹隆橋接連八字橋一帶二十餘里傾巢來爭郭松林飛調易用剛等迎敵自督李長樂等斷後劉士奇等由呂山夾擊楊鼎勳督守尹隆橋老營賊衆衝至易用剛整隊接戰被礮轟擊受傷甚重

郭松林等捲旗突入來往縱橫並飭王平西礮  
船由河內助轟斃賊無數王永勝等由山脊翻  
下疾如風雨逆衆紛竄陣斬僞列王黃千四乘  
勢掩殺擒斬數千名弁兵亦傷亡百餘名臣聞  
賊衆皆趨西路有欲竄之勢飛飭潘鼎新劉秉  
璋等進攻二十六日夜昇山守逆棄壘先走潘  
鼎新會合浙軍劉樹元等追剿次日追至八里



店該逆回拒水陸各軍大破之該逆望風狂奔  
李朝斌劉秉璋張樹聲等各攻毀賊營十餘座  
追至城下沿途殺斃淹斃賊匪無算敗賊擁擠  
入城閉門不及潘鼎新等奮勇先登由東門而  
入遂於是日克復湖州府城潘鼎新已會同浙  
軍入城布置臣卽飛飭郭松林等由四安中路  
截勦劉銘傳等由廣德前路兜勦查此次肅清

蘇浙尤爲出力之布政使銜常鎮道潘鼎新等  
督隊苦戰克復名城應如何優加獎勵之處伏  
候

聖裁其提督劉銘傳等均力扼要衝拌死攻勦應俟  
廣德四安克復後由臣覈實保奏力戰陣亡之  
擬保副將銜儘先參將何錫恩等均請

飭部各照擬保官階從優議卹奏入

上命議政王軍機大臣傳諭曾國藩左宗棠李鴻章  
曰湖州之賊經蘇浙兩軍偪剿疊次獲勝堵逆黃  
汝金等被擊西趨潘鼎新等會合浙軍併力夾擊  
節節進偪克復府城覽奏甚爲嘉悅湖州一城爲  
髮逆悍黨屬聚之所現在雖經收復而堵逆尤爲  
著名悍逆洪幼逆復潛入其中難保不紛竄旁趨  
希圖兔脫湖州西通四安毗連廣德該逆旣節節

築壘護其竄路是蓄意謀竄已非一日李鴻章旣  
飭劉盛藻馳抵廣德卽著迎頭截擊並將四安廣  
德迅圖克復使該逆無可駐足自當易於翦滅郭  
松林屢著戰績此次因奮勇勦賊身受槍傷著傳  
旨存問勛其力疾殺賊以竟全功左宗棠亦當飭  
在事諸軍迅速追勦將敗匪盡行殲除餘匪若由  
廣德上犯則徽甯一帶又形喫緊著曾國藩迅派

得力將弁會同李鴻章所派之軍合力扼擊毋令  
逆蹤上竄以保皖南大局

上諭內閣曰湖州府城爲堵逆黃汶金等占踞希圖  
號召賊黨抗拒官軍經李鴻章派令郭松林等分  
路進攻於七月二十七日將湖州府城克復勦辦  
甚爲得手著左宗棠李鴻章督飭蘇浙各軍將潰  
竄之賊分投追捕悉數殲除尤爲出力之提督李

朝斌謀勇兼優所向無前著發去白玉四喜搬指  
一箇玉柄小刀一把火鐮一把大荷包一對小荷  
包二箇交李朝斌祗領道員潘鼎新督隊苦戰克  
復名城著賞穿黃馬褂翰林院侍講劉秉璋躬冒  
矢石治軍整嚴著賞給振勇巴圖魯名號遇有應  
升之缺開列在前道員張樹聲堅忍百戰積功甚  
多著賞給二品頂戴以按察使遇缺提奏用示優

獎署福建陸路提督郭松林奮勇勦賊左膀受傷  
著先行交部從優議敘仍著俟廣德四安克復後  
由李鴻章查明勞績與提督劉銘傳等一併從優  
保奏陣亡之擬保副將銜參將何錫恩擬保參將  
滕國春擬保參將銜遊擊張祖述擬保遊擊銜都  
司余兆貴曹廣惠均著交部照擬保官階從優議

卹

初七日

乙亥

曾國藩奏言欽奉

諭旨以裁撤兵勇雖爲節餉起見然驟撤三四萬人  
恐此輩久在戎行不能省事等因臣以欠餉太鉅  
久思大加裁撤以節糜費嗣與臣弟曾國荃酌  
定將金陵全軍五萬人裁撤一半查湘勇召募  
之初選擇鄉里農民有業者多無根者少但使  
欠餉有著當可安靜回籍不致別生枝節至挑



補兵額之說近多建此議者臣竊不以爲然蓋  
勇丁之口糧一倍於馬兵三倍於守兵馬糧之  
缺極少守糧月支一兩斷不足供衣食之需誰  
願數千里外補一衣食不敷之缺其情願者皆  
游惰無歸者也臣愚以爲勇則遣回原籍兵則  
另募土著庶爲經久可行又欽奉

諭旨以臣奏稱洪幅瑱積薪自焚茫無實據似已逃

出令查明情形具奏 臣初聞金陵克復亦深慮城  
大必多竄逸難民追殺淨盡之說未敢深信迨  
臣至江甯經由東壩建平各州縣地方文武並  
未報有賊股竄過證以李秀城親供逸出漏網  
之賊似不甚多其洪幅瑱果否尙存 臣已派蕃  
髮降卒赴湖州賊營訪查應俟查明實在下落  
續行具奏

曾國藩又奏言江西之賊占踞許灣者爲僞濂王汪海洋經鮑超破其長濠殺賊數萬分踞東鄉金谿者爲僞聽王陳炳汶懾我許灣之戰遂棄東鄉金谿兩城陸續退遁率衆求撫據鮑超寄到陳炳汶投誠之稟共有黨衆六萬餘人洋槍隊七千餘人皆願效順等語分踞崇仁宜黃之賊爲僞侍王李逆經江忠齡等次第克復踞

南豐之賊爲僞涪王譚逆亦經鮑超克復一切  
調度想經楊岳斌沈葆楨詳奏前欽奉

諭旨飭臣酌派金陵陸師赴江協剿刻下江西軍威

大振無須添派援兵臣所慮者在皖南廣德一

路金陵之師急切不能起程應遣撤者無由籌

給欠餉應出勦者無由籌發行糧不料老巢旣

破而餉絀若此皆臣經理不善之咎也奏入

上命議政王軍機大臣傳諭曾國藩左宗棠楊岳斌  
李鴻章沈葆楨曰裁撤勇丁爲善後第一要務旣  
據曾國藩奏稱湘勇有業者多無根者少但使欠  
餉有著當可安靜回籍卽著責成該大臣妥速辦  
理毋令游惰無歸別生枝節至挑補兵額一節旣  
屬窒礙難行卽著照該大臣勇則遣回原籍兵則  
另募土著之議次第擘畫以期經久可行洪福瑱

敗殘之餘即使其人尙在亦屬無能爲役惟該逆  
僭稱僞號非其餘賊會可比其存亡實在下落必  
應查究明確方足以靖人心仍著曾國藩詳細訪  
查務得確據此時湖州已復該逆曾否竄入湖城  
不難查訪而知並著左宗棠一體查明具奏至金  
陵逸賊旣據曾國藩奏稱漏網無多所有在防將  
士均著免其查叅以勵有功聽逆陳炳汶率衆求

撫自係囑於軍威惟黨衆有六萬餘人洋槍隊七千餘人爲數太多安置遣散均不易辦楊岳斌當督飭鮑超察看真僞妥籌辦理不可稍涉大意現在情形及汪海洋譚逆李逆等蹤跡楊岳斌卽會同沈葆楨迅速詳細具奏其皖南廣德一路防剿尤關緊要著曾國藩迅速派得力陸師籌給餉項飭令剋日起程扼要駐紮會同李鴻章派撥弁兵迎

勦竄賊毋稍延緩

初八日丙子左宗棠奏言自蔣益澧馳抵菱湖後

冒暑鏖戰賊惟憑壘堅拒七月初二日蔣益澧於思溪雙福橋之間槍搭浮橋以通蔡元吉各營糧道副將徐文秀等馳至蔣益澧卽飭提督劉清亮等攻思溪徐文秀等繼之總兵劉樹元各營及洋將實德梭等攻雙福橋蔣益澧自率



親兵及提督高連陞等分兩隊嚴陣以待飭洋將德克碑率花勇沿河助戰並以淺水輪船載開花礮泊於河汊對思溪八角亭賊壘轟擊各營甫至中流賊壘洋槍齊發勇丁受傷多名副將蔣榮彩等仍奮勇前進爭先搶入至離岸不遠賊礮愈密勇丁傷亡愈多蔣榮彩黃鎮湘彭開壽李世祥均受重傷蔣益澧復用划飛渡德



馳至賊始駭遁初八日蔣益澧飛調洋將德克  
碑日意格淺水輪船赴荻港會剿並令高連陞  
等一齊衝殺輪船巨礮同時轟發該逆猝不及  
備各勇越濠而入立斃悍賊六七百名餘賊溺  
斃無算將荻港賊壘三座攻克是夜有賊目僞  
天安譚侍友等率長龍舢板戰船十號赴蔣益  
澧軍前乞降十一至十三日蔣益澧親督徐文

秀等乘師船四十餘號由荻港繞出太湖會同  
德克碑日意格由荻港用開花礮轟攻袁家匯  
賊壘環攻三時將傍街賊踞房屋轟塌大半斃  
賊無數當酣戰時蔡元吉見賊勢趨重袁家匯  
當挑健勇五百名隨遊擊楊應龍由思溪突圍  
而出逆賊層層抄襲楊應龍奮威衝殺手刃數  
賊力竭陣亡蔡元吉所部營官楊成棟向得勝

亦歿於陣勇丁僅衝出百餘人蔣益澧當飭各營竟夜奮攻袁家匯賊壘以掣賊勢是夜蔡元吉竟從東埠鼻水衝出重圍所部勇丁及楊應龍營勇隨同衝出者不及千人飢疲實甚蘇軍及已革道員張景渠等將晟舍賊巢攻克賊見蔡元吉已經出圍而晟舍又經官軍攻破意氣沮喪思溪雙福橋等處踞逆均紛紛退竄劉清

亮等各率所部乘夜過河大呼殺入約斃千名  
其迫溺而斃者不計其數當將賊營數十座一  
律踏毀劉清亮等營已移蔡亭子橋進攻長超  
山踞賊高連陞等水陸各營會同洋將德克碑  
進攻袁家匯能速奪此兩隘即可徑抵城根臣  
查湖州地勢守易攻難而蘇軍自克晟舍後李  
鴻章毅然以攻取廣德州爲己任已得制賊要

著大局既合長圍已成檻獸釜魚遲速有必滅  
之理旬日以來逃出難民及投誠僞目等皆言  
僞幼逆因初二日之戰畏懼頗甚逃避廣德州  
黃汝金遣其弟僞值王黃汝英護之各賊多備  
乾糧似有急竄之意但恐賊竄甚速防不及防  
必致蔓延地方幸連接各路咨報江西腹地漸  
清臣軍之援江者王開琳王德榜兩軍已還駐

弋貴之交可就近調赴婺源馬金一帶與浙師  
聯絡其黃少春一軍及劉明燈等各營現已飛  
調移紮嚴州相機分撥以備迎頭攔剿此次力  
戰陣亡之遊擊楊應龍擬請照副將例議卹傷  
亡之副將蔣榮彩擬請照總兵例議卹其餘傷  
亡中外各弁勇容俟查明彙案請卹至同知蔡  
元吉久困重圍忍飢血戰斬擒悍賊最多雖所



部傷亡千人應否免其置議之處出自

天恩

左宗棠又奏冒據蔣益澧飛報自官軍徧紮亭  
子橋等處後七月二十五日湖州守賊僞天將  
陳學明率千餘人來降次日長超山踞賊僞天  
將陳姓及姚姓劉姓以所轄三壘之衆來降是  
日劉樹元會同蘇軍猛攻昇山賊壘拔之瞭見



隨派劉大謨等會合進攻逆衆驚惶由小東門衝出逃竄蹂殘死者不計其數各營分投追殺伏屍滿地救出難民數千人餘匪悉遁南豐當於七月十三日將宜黃縣城收復參將韓進春自擊敗上塘竄匪後派董德春等督率各營及建昌練勇協同規取南豐十六日勦破裏塔墟踞匪直逼南豐西北兩門奮力仰攻翼日董德

春復與魏高勝等分攻東北兩門賊亦分股抵拒正慶戰閒適鮑超馬隊馳至馬步齊進前任南豐縣知縣莫廷蕃署知縣譚澧亦率練丁協助賊衆大潰由西門擁出分路逃竄各營縱橫截殺斃賊無數卽克復南豐縣城敗匪一竄廣昌大路經王昌全等追勦一竄河東爲霆營馬隊殲斃殆盡臣等查兩城敗匪上竄廣昌甯都

已徂南贛其東鄉金谿敗匪現聚瀘溪新城南

贛甯三府州毗連閩粵新城亦與閩接壤誠恐

竄入鄰省且恐湖州敗賊竄江業經檄令鮑超

進剿新瀘防賊入閩總兵王開琳等回駐弋陽

貴溪以遏浙西敗賊並防新瀘之賊敗竄回浙

復令精捷營馳赴贛州迎頭截擊劉典與道員

王文瑞等馳赴甯都兜剿臣楊岳斌於十六日

自南豐拔營與劉典會商戰守不日前赴贛甯  
就近調度但贛甯等處山嶺崎嶇僻徑歧出尾  
追深恐不及仍飛催劉典等迅繞賊前擇要扼  
截並令席寶田韓進春跟蹤追勦期將羣醜聚  
殲至此次克復南豐宜黃出力人員可否容  
等擇尤請獎出自

天恩

楊岳斌沈葆楨又奏冒據吉南贛甯道王文瑞  
稟稱宜黃股匪竄至槎路口當派鄧榮達等截  
擊並令曾聚賢等由葛仙嶺繞赴交湖協防七  
月十二日鄧榮達等戰於槎路口大獲勝仗斃  
賊二百餘人旋聞賊衆將犯樂安永豐復飛調  
鄧榮達等赴交湖助戰十三十四等日我軍三  
路迎戰連斃先鋒悍賊數百該逆糾大股來

犯爲熊常富等擊敗我軍追近東陂三路會合  
包抄賊衆腹背受敵紛紛敗走自相踐踏死者  
無算追殺十餘里斬馘尤多敗匪悉向南豐遁  
去又據署甯都州知州郭毓龍稟稱宜黃之賊  
竄入東陂約萬餘人十六日直撲北門郭毓龍  
與參將石玉督兵固守該逆晝夜攻圍經各員  
弁督率兵民槍礮齊施約斃賊百餘人賊始退



去各等情臣等查宜黃敗賊屢犯槎路口交湖  
意在竄越樂安永豐以窺吉郡經王文瑞三次  
痛勦足以絕其西向茲復往撲甯都臣等惟當  
嚴督各營四面截殺務期聚而殲旃

楊岳斌沈葆楨又奏言據探濂逆大股由許灣  
上竄新城縣界署知縣唐先霖親督兵練擊之  
小有斬獲七月十五日又赴河坊雕勦唐先霖

受傷落馬兵練亡失頗多該逆繞由城南塌處  
關入超鮑從建昌督隊進攻連獲全勝於二十  
三日夜將新城縣城收復等情其詳細情形應  
俟查明具奏

楊岳斌沈葆楨又奏言據鮑超文稱該提督克  
復金谿後偽聽王陳炳汶偽甯王張學明偽樊  
王陶金會於七月十一二等日三次遣陳炳汶

之弟陳報林具稟投誠據稱伊等前被廣西賊匪所擄並非甘心投賊因濼逆汪海洋平逆翟添瀾有衆十數萬人致被欺伏屢欲投誠均爲攔阻今汪海洋賊壘被毀翟添瀾就擒伊等喜無阻滯具稟投誠懇請寬其既往部下人衆尙有六萬人洋槍隊七千餘人等語鮑超以陳炳汶等敗伏山谷一經進剿勢必遁走福建擾害

鄰疆旣據悔罪投誠情詞懇切應准免罪已派  
總兵洪容海前往飭令薊髮又據參將韓進春  
稟稱七月十二日有僞元勳李三畏等率夥黨  
二千人自金谿萬年橋北赴營投誠韓進春詳  
察其意無他卽派兵弁前往曉諭撫慰降衆均  
各悅服概行薊髮當將器械一律收繳各等情  
臣等查鮑超轉戰數省頻摧巨寇收撫降衆威

信素著降人陳炳汶等悔罪投誠深明順逆情  
實可原自應仰體

皇仁寬其既往予以自新使他股逆衆聞風向化業  
經臣等咨行鮑超妥爲辦理並委員會同查造  
降衆籍貫清冊發給護票分別遣散陳炳汶張  
學明陶金會率衆歸化其志可嘉陳報林連次  
來營不避艱險可否分別給獎以資觀感出自

鴻施其韓進春收降李三畏等一股亦經臣等飭令會同建昌府妥爲遣散頭目李三畏等暫行酌給六品頂戴留營效力均奏入

上命議政王軍機大臣傳諭曾國藩左宗棠楊岳斌毛鴻賓李鴻章沈葆楨徐宗幹郭嵩燾曰官軍攻復宜黃後南豐縣城亦經霆字等營克復辦理均極得力所有出力人員著准其擇尤保奏惟敗匪

上竄廣昌甯都已徧南贛其東鄉金谿敗匪現聚  
瀘溪新城南贛甯三府州毗連閩粵楊岳斌等已  
派鮑超進剿新瀘防賊入閩王開琳等回駐弋陽  
貴溪以備浙西敗賊勾結楊岳斌不日馳赴贛甯  
調度著卽飛催劉典等繞出賊前扼要兜擊並令  
席寶田等跟蹤追剿以期一鼓聚殲無任再有竄  
逸克復新城詳細情形仍著查明具奏湖州業經

克復浙西敗賊恐復上竄並著責令王開琳王德榜以勦爲防勿稍疏懈陳炳汶等投誠旣屬真心悔罪自應網開一面准予自新楊岳斌等當傳知該降衆等俾知感奮圖功如續有勞績仍准保獎但其人數在數萬以上概予遣散後患必多是否酌留效力未據聲明其洋礮等件曾否呈繳均著飭令鮑超等妥爲經理李侍賢汪海洋現在何處



此二逆必須殲除方免滋擾鄰省宜黃之賊屢犯  
槎路口交湖經王文瑞三次痛勦茲復往撲甯都  
著卽催督各軍四面截殺敗匪上竄廣昌甯都已  
偏南贛著會國藩楊岳斌等飭令派山各軍繞前  
截擊務須就地殄除能否增兵繞越甯都一帶扼  
賊南竄並著會國藩等酌度辦理毛鴻賓等亦當  
派兵出境防堵不得任其闖入其竄甯都之賊與

閩省切近左宗棠徐宗幹務飭兵練認真設防遇  
賊卽擊張運蘭已取道嘉應赴閩卽著令其迅速  
前進擇要駐紮毋令一賊竄入閩境湖州克復昨  
已據李鴻章奏報仍著左宗棠將詳細情形查奏  
洪幅瑱逃避廣德李鴻章所派之軍力攻州城自  
未可稍涉鬆勁著曾國藩左宗棠李鴻章督飭各  
軍將該逆擒獲毋令漏網湖州收復後賊由西門

山竄何處著左宗棠李鴻章查明具奏一面飭令  
蔣益澧等會同蘇滬各軍躡蹤緊追不得任其紛  
竄四安梅溪等處踞賊尙多李鴻章當飭各軍節  
節掃蕩以期漸次肅清湖州力戰陣亡之遊擊楊  
應龍著照副將陣亡例議卹傷後身故之副將蔣  
榮彩著照總兵陣亡例議卹同知蔡元吉所部雖  
多傷亡念其久因長圍忍飢血戰著免其置議

上諭內閣曰江西官軍自攻克崇仁後乘勝進規宜黃七月十二日劉大謨等軍直薄城根當於十三日收復宜黃縣城餘匪悉向南豐遁去十八日董德春等軍進攻南豐正鏖戰閒適鮑超所派馬隊繼至卽於是日將南豐縣城克復勦辦甚屬得手仍著督飭各軍跟蹤追勦盡殲醜類所有此次克復宜黃南豐二城出力人員著准其擇尤保奏

上又諭內閣曰楊岳斌沈葆楨奏賊酋陳炳汶等於  
官軍克復金谿後遣黨陳報林稟懇投誠又賊目  
李三畏等率黨投誠呈繳器械各等情前經朝廷  
明降諭旨凡被賊脅而悔罪自新者皆准免死此  
次陳炳汶等自拔來歸並率六萬之衆同心反正  
願納器械數千件助剿殘匪尙屬真心悔罪若不  
寬其既往無以昭激勸而廣仁恩陳炳汶等均著

准其投誠陳炳汶並賞給參將銜張學明陶金會  
陳報林均賞給遊擊銜李三畏賞給六品頂戴並  
均准留營效力此係朝廷恩施法外予以自新若  
他股賊衆咸知不殺之仁聞風向化仍著該督撫  
等妥爲酌辦

同日富明阿奏言臣行抵金陵與曾國藩面商  
江北撤防各事再三籌畫江南業已肅清當此

餉項支絀自應恪遵

訓諭酌量裁撤防兵惟裏下河十數年完善之區揚  
防一軍正當衝要雖內地已靖而外患未清楚  
北賊勢尙張由麻城羅田以達揚州沿江皆無  
衆兵扼守仍須緩爲抽裁未可全行凱撤臣回  
揚營後接准湖北統帶馬隊四川副都統富森  
保函稱據擒賊及投誠賊首供稱賊衆因麻城

一帶無糧可據聞江北饒富欲於秋涼時大股  
東下先踞揚城爲就食聚糧接援金陵之計臣  
惟賊巢已拔各路軍威正盛餘逆已同阱獸自  
可無虞旁竄然賊情詭詐必有備無患庶不致  
臨時掣肘故揚防一軍未敢驟請全裁誠以裏  
下河爲財米之鄉江南實賴其利卽將來善後  
一切亦須取給於此加以地方遼闊五方雜處



若因目前無事全軍議裁不但宵小易生設有  
不虞全功盡棄且江北陸軍設防十有餘載餉  
源久竭積欠太多目下水師所裁之第三批欠餉  
係在本省找領糧臺僅籌一月口糧尙復東羅  
西掘况鎮軍現當凱撤若再將江北陸軍同時  
並裁則糧臺必更難措手臣思維再四擬俟水  
師第三批裁竣後再裁揚防陸軍數千名以節糜

費其餘應視糧臺進款之多寡及各路軍情之  
緩急隨事隨時斟酌裁撤庶糧臺既可騰挪而  
防務仍資鎮守實於軍事有裨至揚防官兵自  
咸豐二三年由各路徵調來揚江北江南轉戰  
十餘載嗣因臨陣傷亡甚多兵力不足始行招  
募勇丁防剿亦均得力今幸江甯克復合無仰  
懇

天恩准臣將揚防各營官弁兵勇擇其從征年久尤  
爲出力者奏請獎敘出自

鴻施奏入

上命議政王軍機大臣傳諭富明阿曰據奏接富森  
保函稱湖北擒獲賊供因麻城一帶無糧可攜聞  
江北饒富欲於秋涼時大股東下爲就食揚城接  
援金陵之計所供各情該逆自尙未聞金陵克復

之信此時老巢業經攻克江南一律蕩平楚北官軍勦辦甚屬得手賊勢已蹙尙不至大股東趨惟賊蹤趨向未定逆情詭詐難保不因被勦窮蹙復圖竄擾完善是江北之防仍不可稍鬆若遽將各軍概行裁撤未免太形空虛且據該將軍奏稱水陸各軍欠餉甚多一時難以籌給亦係實在情形著照所擬俟水師三批裁竣後卽將揚防陸軍先

爲酌撤數千名以節糜費其餘酌留若干名暫緩  
裁撤仍著認真訓練實力巡防以期有備無患勿  
致虛糜餉項所有揚防各營官弁兵勇從征有年  
著准其查明尤爲出力者奏請恩施毋許冒濫

欽定勦平粵匪方略卷三百八十九 甲子年

八月十一日 己卯 馮子材魁玉奏 臣等自奉

諭旨凱撤兵勇後卽通飭各營起造兵勇花名清冊  
連日督同總兵張文德陶茂森等將定復奇勁  
雄宜制七營兵勇暨果凱勝等勇一營共計四  
千一百餘名作爲頭起凱撤派原營將領分起  
管帶由糧臺發給川資卽日就道責令沿途妥

爲約束不准攜帶兵仗逗留滋擾先經知會經  
過地方官查照彈壓並由臣等遴派委員分投  
催趨出示曉諭其三江本省應募勇丁收繳軍  
械號衣給發川資分別交地方官收管遞送回  
籍歸農仍咨明江南北軍營地方一體查照轉  
飭文武體察情形隨時約束至其中精壯可用  
者應否挑補綠營兵額已飭該管將領查明存

記聽候督撫諸臣咨商辦理各營將領實缺人員分別給咨俟管領兵勇凱旋事竣各赴本任其儘先候補人員飭令各赴本省投標委用以示體恤奏入

上命議政王軍機大臣傳諭會國藩李鴻章馮子材魁玉曰鎮防定復奇勁雄宣制七營並果凱勝等勇共計凱撤四千餘名作爲頭起派委原營將領



管帶給發川資起程不准攜帶兵仗逗留滋擾並  
知會地方官彈壓其三江本省應募勇丁分別交  
地方官管遞回籍咨明江南北軍營地方官約束  
辦理甚爲妥協卽著馮子材等飭令派出各員知  
照沿途各該地方官一體認真彈壓毋令生事其  
未經遣撤兵勇現經馮子材等查明精壯可用者  
存記應否挑補綠營兵額著曾國藩李鴻章會商

馮子材等妥辦鎮防雖屬安穩惟該處兵勇業已  
裁撤以後防務李鴻章當妥籌兼顧不可稍涉大  
意鎮城留守各營後起凱撤事宜卽著馮子材等  
按照此次辦法妥爲遣撤

十三日 辛巳 李鴻章奏言尹隆橋賊壘屢攻不下

郭松林等會議以賊聚守一處無隙可乘須避  
實擊虛改由後路抄入七月二十五日卽飭李

長樂等派隊出哨聲言進攻八字橋以分賊勢  
密令各營乘夜繞大德橋渡河先奪扼橋賊壘  
次夜郭松林等均於大德橋親督于奇泮等疾  
趨渡河圍攻逆壘並分隊攻僞王相李紀才賊  
營堵住虹星橋尹隆橋援賊進及里許我軍奮  
呼衝擊賊不能支相率開營跪降大德橋及沿  
山賊壘一律掃平劉士奇所部遂移紮南岸官

塘城賊全股來爭此路郭松林等飛約各軍乘  
機攻城堵逆黃汶金率悍賊數萬由尹隆橋遙  
擁而來郭松林督隊由官塘接仗淮揚水師及  
王平西礮船沿河助攻楊鼎勳等直搗中堅衝  
突入陣斃賊二三千人堵逆不支率衆回奔追  
至橫塘渡尹隆橋立破堅壘十餘座李長樂等  
亦乘勝攻取八字橋賊知湖城已破四安又不

得去遂折而迤南突分兩路一從北岸一由河  
南向港口小溪口梅溪直趨安吉郭松林飛派  
李長樂等從城隍山略取湖州親率大隊由八  
字橋渡河追剿王永勝由港口追剿楊鼎勳由  
尹隆橋向小溪口追剿劉士奇由大德橋向梅  
溪追剿王永勝追至港口拆斷浮橋適郭松林  
躡至南岸賊約萬餘悉偪山谷聚殲無遺劉士

奇楊鼎勳追至小溪口及梅溪鎮四面圍殺伏  
屍二三十里僞列王等逆酋均死焚奪賊船千  
餘隻旗幟器械馬匹無數生擒逸賊萬餘救出  
難民數千人餘賊尙匿梅溪山內擬飭各軍入  
山搜勦前調道員吳毓芬探知湖州已破恐賊  
由林成橋分竄四安當卽親帶洋槍隊冒雨宵  
征並派羅義勝水勇擡小舟數隻隨行馳抵觀

音橋用小舟渡過數十人賊驚拒戰吳輔仁等  
踰濠撲營吳毓蘭揮兵乘之賊大驚潰斬殺甚  
衆吳毓芬見要隘已得令吳毓蘭等循河南攻  
午山橋賊營自帶陳占榜等由河北攻林成橋  
賊營洋槍炸礮連環轟擊先攻破甲午橋二營  
繞至林成橋南賊亦棄營向四安狂走吳毓芬  
急追二十里見路南山中賊多如蟻盡向西奔

沿路斬擒七八百名投降千餘人追至四安吳  
統蘭設伏誘賊賊果涉水擁至伏兵起擊我軍  
隨後掩殺萬國本等衝入賊隊大呼降者不殺  
跪降千餘人陳占榜嚴陣進倡余嘉鼇等鼓噪  
乘之連破河南北賊壘五座一日夜閉冒雨轉  
戰八九十里計殲斃賊目數十擒斬千餘解散  
三千餘人劉銘傳行抵建平後探知廣德踞賊



在城外築壘遂於建平布置糧道先令周盛波等移紮白茅嶺水口自率劉盛藻等直抵城下賊衆迎拒我軍槍礮齊發賊遽返奔追至西門適周盛傳亦派隊助剿並抵北門城賊遂由南門出走我軍分路兜殺擒斬數百名餘匪向甯國安吉山中竄去當將廣德州城克復劉銘傳派周盛波等入城駐守臣查湖州踞逆恃有西

面竄路負嶠不下自浙軍分攻安吉臣軍橫截  
尹隆橋等處要隘並進廣德以扼其吭堵逆見  
咽喉將斷果欲背城一戰旣不能西乃折而南  
圖竄安吉幸各軍猛進沿途敗賊大股受創從  
萬山叢雜中逸出無多糧藥輜重拋棄殆盡前  
路徽浙交界各有截勦之軍當不難於撲滅此  
次統領各軍之提督郭松林等謹先行開列仰

懇

聖恩優加獎勵陣亡遊擊杭進先守備葉雲龍請

飭部照陣亡例從優議卹其餘應獎應卹人員仍容

臣查明彙奏奏入

上命議政王軍機大臣傳諭曾國藩左宗棠李鴻章  
曰湖州攻克後賊衆分股直趨安吉劉士奇等追  
至梅溪斬馘不少吳毓芬一軍追勦直破四安及

沿路賊壘劉銘傳等率隊由建平進攻廣德州城  
賊開南門而逸竄向甯國安吉山中李鴻章現派  
周盛波等駐守廣德所辦均屬妥協惟湖州之賊  
擁衆竄入廣德未受大創遽由南路出竄其人數  
必尙不少所稱敗賊大股受創從萬山叢雜中逸  
出無多糧藥輜重拋棄殆盡前路徽浙交界各有  
截勦之軍當不難以次撲滅等語此乃懸擬之詞

不可恃以無恐甯國一路防軍甚單且堵逆黃汝  
金及幼逆洪幅瑱均未伏法必將竄擾徽甯號召  
羣逆或與江西匪黨聯絡勾結著曾國藩左宗棠  
嚴檄徽甯守將慎重防剿黨兵力單薄卽各添撥  
勁兵助剿並探明賊蹤已竄何處迅速具奏李鴻  
章素能不分畛域著卽飛調得勝兵勇出境追剿  
以竟此一簣之功黃逆洪幼逆下落並著查明具

奏

上諭內閣曰浙江湖州賊黨分踞尹隆橋等處要隘  
郭松林等分路進剿將賊壘掃平遂斷湖州至四  
安廣德之路堵逆黃汶金率悍黨回奔官軍追至  
尹隆橋立破賊壘十餘座賊遂分竄港口小溪口  
梅溪一帶郭松林等分投進剿四安之賊經吳毓  
芬一軍進剿連克五營劉銘傳一軍探知廣德踞

賊在城外築壘督軍馳勦當將廣德州城克復勦  
辦甚爲得手仍著李鴻章督飭各軍會同浙師乘  
勝掃蕩盡殄逆氛所有此次尤爲出力之提督郭  
松林總兵王永勝劉士奇均著賞給雲騎尉世職  
記名提督楊鼎勳周盛波均著賞穿黃馬褂道員  
吳毓芬著賞加按察使銜提督李助發周正林均  
著遇有提督總兵缺出分別提奏總兵易用剛周

蘭亭文茂林李新燕均著交軍機處記名遇有提  
督缺出請旨簡放提督陳有昇著交部照頭等軍  
功從優議敘總兵梁安邦著遇有總兵缺出儘先  
提奏龔生陽葉廷杓高占彪均著遇有總兵缺出  
儘先提奏並賞加提督銜張家瑜著遇有總兵缺  
出儘先提奏並賞給二品封典宋德鴻等均著賞  
加提督銜李長樂等均著賞給二品封典副將王



萬釗左日昇于奇泮黃桂蘭張志邦江開泰王占  
魁楊開太趙友文均著交軍機處記名遇有總兵  
缺出請旨簡放趙友文並賞給迺勇巴圖魯名號  
王萬釗並賞給二品封典參將楊正清著賞給穎  
勇巴圖魯名號守備譚正武遊擊張遵道均著以  
副將仍留湖南儘先補用譚正武並賞給銳勇巴  
圖魯名號張遵道並賞給勛勇巴圖魯名號參將

張正全著以副將留於兩江儘先推補並賞加總  
兵銜萬重暄等均著以副將留於兩江儘先補用  
朱寶元著以副將留於兩江補用陳曰有等均著  
以副將儘先補用並賞加總兵銜余嘉鼈等均著  
以副將儘先補用遊擊張壽堂等均著以參將仍  
留江蘇補用並賞加副將銜曹廣澤著以參將儘  
先補用並賞加副將銜都司廖德旺等均著以遊

擊儘先補用廖德旺並賞換花翎守備吳輔仁等  
均著以都司補用千總周金海著以守備補用並  
賞加都司銜擬保守備銜張裕文著以千總拔補  
並賞加守備銜候選同知直隸州知州包國挺著  
以本班遇缺先選並賞加知府銜知縣楊嘉善著  
免補本班以同知直隸州知州補用並賞加運同  
銜陣亡之遊擊杭進先守備葉雲鼇均著照陣亡

例從優議卹

同日李雲麟奏冒疊據各路探報蔡啟兩逆與官軍接戰屢敗於七月十二日夜同時南竄查該逆未竄以前臣恐其涉淺偷渡當於五月間派定興水師營前赴石泉西鄉洋縣城固等處以礮船往來梭巡嗣知該逆蓄志回川意欲山洋縣以下之鍋灘渡江至西鄉斜趨太平一路

臣復加派千總樊遇春帶歸義營馳往鍋灘池  
南助勦並派知縣廣瑛前赴西鄉定遠之交聯  
絡民團認真防禦昨據都司李長清稟報二十  
一日夜突有悍賊五六百人竄至河邊意圖偷  
渡該都司卽派礮船勇丁登岸埋伏俟賊近時  
出擊該逆未知虛實驚潰狂奔我軍從後掩殺  
斃賊二十餘人生擒賊目一名二十三日該逆

大股齊至鍋灘金水西河等處意欲砍伐樹木  
搭蓋浮橋齊隊過河經水師奮擊不退適歸義  
營趕到會同水師槍礮齊施始將逆衆擊退該  
逆見勢不能渡當卽沿江西竄意圖上趨褒沔  
查褒沔接壤川疆川省邊界均駐重兵該逆豈  
能飛渡漢中附近無糧賊亦斷難久停誠恐抵  
褒沔後轉而東竄由西鄉出紫陽甄坪從此南

趨夔萬以入川東窺房竹以擾楚一經蔓延賊  
勢復熾當飭遊擊姜維揚率領楚軍先行馳赴  
西鄉迎勦並酌留四營防守興郡臣亦擬卽親  
赴前敵相機調度奏入

上命議政王軍機大臣傳諭官文略秉章吳昌壽劉  
蓉李雲麟曰蔡啟兩逆由洋縣以下之鍋灘金水  
酉河等處意圖搭蓋浮橋渡河經官軍擊退賊見

勢難偷渡卽沿江西竄圖趨褒沔該逆抵褒沔後  
如折而東竄由西鄉出紫陽甄坪從此南趨夔萬  
以入川東窺房竹以擾楚均有防不勝防之勢亟  
應嚴密堵禦著官文吳昌壽略秉章各就本境檄  
飭將弁實力嚴防毋令匪蹤闖入李雲麟卽飭派  
山之遊擊姜維揚一軍趕緊馳赴西鄉迎頭截擊  
並著該京卿剋日親赴西鄉前敵相機調度迅掃



賊氛並著劉蓉妥籌兼顧抽撥勁旅前赴西鄉一帶會籌掃蕩

十五日癸未左宗棠奏言據蔣益澧稟稱七月二

十六日接總兵劉樹元攻克昇山之報知賊竄必速卽飭高連陞督同蔡元吉等進駐湖郡妙喜鎮分飭楊政謨等水師進攻長超山袁家匯賊壘該逆瞥見湖城火光紛紛棄壘狂竄時劉

樹元各營已進八里店蘇軍道員潘鼎新亦率所部會剿敗賊紛向湖城逃竄未及進城賊已急啟西門而遁劉樹元潘鼎新當先衝殺入城蔣益澧督軍將竄賊橫截斬馘無數劉清亮等分門而入當於二十七日將湖州府城克復其由西門出竄之賊高連陞斬馘二千有奇二十八日蔣益澧復率謝茂勝等向梅溪一路追剿

逆賊連夜棄船而逸經蘇軍及總兵羅大春所  
部截殺拔出難民不少偽穰王黃紹忠等率衆  
百餘名詣羅大春軍前乞降訊據賊供堵逆黃  
汶金由梅溪徑趨廣德祐逆李遠繼由安吉以  
出孝豐另分一股由四安竄廣德蔣益漣當飭  
蔡元吉等駐梅溪自率高連陞等向四安追剿  
比抵四安竄賊已經蘇軍道員吳毓芬等截殺

殲斃甚多堵逆黃汝金於二十九日竄至廣德  
卽挾洪幼逆由甯國縣昌化績溪逃竄僞值王  
黃汝英與忠逆之子由甯國府向涇縣祁門逃  
竄此次各逆拌死突竄經蘇浙兩軍猛追攔截  
殺賊不下萬餘溺斃及自相踐踏死者不可勝  
數其逃散之賊見官軍至輒跪伏道旁泣求免  
死約計陸續逃散者不下數萬俱已遣令歸籍

現蔣益澧已分飭劉清亮等赴分水孝豐截擊

其楊昌濬進規安吉一軍於七月二十四日會

同總兵周廷瑞各營分路進攻拔樁毀柵槍礮

轟擊城賊大震二十八日夜急向孝豐逃逸適

湖州大股紛紛竄至楊昌濬飭朱明亮等出安

吉南路會同周廷瑞協力兜剿各軍追至殺賊

無算收降七八千人楊昌濬馳至孝豐適逆賊

二萬餘正撲縣城楊昌濬督隊奮擊知府劉璈等從城內殺出賊卽退竄官軍乘勢蹙之陣斃僞駙馬烈王徐朗等賊目數十名斬馘千餘級赴水死者數千名解散尤多餘賊向山谷狂奔已過河者悉向甯國縣千秋關竄走三十日楊昌濬復率劉璈等追殺至章村地方該逆憑河死拒官軍槍礮齊施賊不能支翻越而遁官軍

追至甯國縣屬七都余村等處突遇龍旗悍賊  
千餘騎乘勢掩殺斃賊多名生擒二千餘名拔  
出難民五六千名八月初一日劉璈復派遊擊  
唐湘遠追擊又殺尾賊數百名收降千餘解散  
數千據逃出賊供三江兩湖被脅之衆俱已逃  
散淨盡祜逆李遠繼僅帶數十人逃往廣德與  
黃汶金合併臣查此次賊由湖州安吉出竄形

勢已極渙散各軍四面兜剿殺斃溺斃及逃散  
就撫者約計不下十數萬人僞匡王賴汝鳩亦  
經官軍殺斃其餘各賊目或死或逃者甚多各  
營所收降賊俱已分別資遣該逆由孝豐竄出  
歸併廣德復與踞逆黃汶英及洪幼逆等分路  
上竄勢必假道徽池以擾江西而爲入粵之計  
臣已飛咨皖南江西各處防軍並嚴飭高連陞



等躡蹤緊追飭黃少春一軍從嚴州繞赴前途  
王德榜王開琳兩軍併赴婺源浮梁一帶相機  
截擊無論竄皖竄江總當盡力截剿將此股悉  
數殲除至攻取湖州安吉兩城在事文武數月  
苦戰尙屬著有微勞擬俟此股竄賊剿除再行  
分別保獎奏入

上命議政王軍機大臣傳諭曾國藩左宗棠楊岳斌

毛鴻賓沈葆楨徐宗幹郭嵩燾曰安吉一城與湖  
郡犄角經楊昌濬及周廷瑞等軍攻拔並追勦竄  
賊大獲勝仗殺斃溺斃及逃散就撫者約計不下  
十數萬人勦辦甚爲出力所有在事文武數月以  
來疊次苦戰尙屬著有勞績著俟此股竄賊勦除  
卽由左宗棠分別保獎惟堵逆黃汶金挾幼逆洪  
幅瑱由昌化績溪逃竄值逆黃汶英與忠逆之子

向涇縣祁門竄去漏網餘氛分路上竄必將假道  
徽池以擾江西而爲入粵之計左宗棠已飭提督  
高連陞等躡蹤緊追並飭黃少春王德榜等軍從  
徽嚴一帶繞出賊前相機截擊卽著嚴飭諸軍盡  
力截勦毋論竄江竄皖總期悉數殲除李鴻章恪  
遵前旨飛調得勝兵勇會合浙師出境追勦楊岳  
斌沈葆楨督飭饒景等處在防將士實力扼堵毋

令一賊入境江右敗賊竄至贛甯南贛防務喫緊  
此次湖州等處竄賊又有由江入粵之意毛鴻賓  
郭嵩燾務當懷遵疊次諭旨先事圖維派兵出境  
防堵張運蘭已取道嘉應赴閩卽著徐宗幹催令  
迅速前進擇要駐紮以固閩省邊防皖南防兵單  
薄曾國藩當迅撥陸師前往助剿毋稍疏虞  
同日喬松年奏言據蔣凝學連日報稱自七月

二十七八日擊敗金家鋪竄賊後該逆合衆數萬屯圍英山縣城蔣凝學乘夜進剿賊始敗退而後股又至衆約數萬於三十日復圍縣城蔣凝學率兵力戰將賊擊退復派各營傍城截擊以寡敵衆苦戰數時俘馘數百名追至南路山岡擒斬約有千人解散甚衆都司譚孚泗等皆以深入力戰被害等語臣查此次逆衆猛撲英

山彼衆我寡經蔣凝學奮力擊退英山自可無  
虞惟此股多係髮逆其捻逆散漫東竄必接踵  
而來六安舒城一帶均須嚴防臣先派張得勝  
駐守六安又派副將張景春帶隊續往交張得  
勝統帶以厚兵力又調陳飛熊一營往守舒城  
頃據探報賊在白杲鎮爲官兵擊敗由湖北松  
子關東竄或竄固始或竄六安均未可定臣已

函商僧格林沁將英翰一軍調回皖省馳往六安以期會合防兵迎頭截擊免致賊匪深入臣  
一面整練隊伍勤發偵探以期見賊卽擊斷不致稍有疏虞至英山接仗陣亡之副將王福齋  
陳世益參將劉清泰都司譚孚泗艾高陞都司  
銜守備葉得勝守備王友勝守備銜千總馮得  
友把總周龍順向友發千總葉華榮力戰捐軀

殊堪憫惻相應請

旨飭部從優議卹以慰忠魂奏入

上命議政王軍機大臣傳諭僧格林沁官文曾國藩  
喬松年曰髮逆糾衆數萬屯圍英山縣城經蔣凝  
學統率所部官軍馳往進剿賊匪敗竄追至南路  
山岡斃匪甚衆勦辦尙爲得力惟捻逆散漫東竄  
勢將接踵而來六安舒城一帶均須實力嚴防該



撫已添派兵勇交張得勝統帶駐守六安並調陳  
飛熊往守舒城布置甚爲周妥著卽飭令張得勝  
等嚴密防守毋稍疏懈白杲鎮之賊由松子關一  
帶圖竄六安是六安防剿更形喫緊喬松年擬調  
英翰一軍回皖協剿著僧格林沁卽飭英翰馳往  
六安與在防各軍迎頭截剿並著官文督飭各路  
將弁追賊出境會合英六等處防兵兩面兜擊盡

殲醜類英山接仗陣亡之副將王福齋陳世益參  
將劉清泰都司譚孚泗艾高陞守備葉得勝王友  
勝千總馮得友把總周龍順向友發千總葉華榮  
均著交部從優議卹